

Pinngitsaaliilluni angerlarsimaffiup avataanut inissiinernut atatillugu innuttaasut eqqartuussissuserisumik ikiorneqarnissaat aamma meeqqat inissinneqarnerannut atatillugu atugassarititaasut, innuttaasut suliap ingerlanerani toqqissisimanermik qulakkeerinniffiginissaat aamma inuit pisinnaatitaaffiannut eqqartuussivimmuut maalaaruteqarsinnaanermik periarfissaqarnissaat pillugu apeqquteqaat aallaavigalugu oqallinnissamik siunnersuut.

(Siumut)

Akissuteqaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siumut apeqquteqaat aallaavigalugu oqallinnissamik siunnersuutaanut qujanaq.

Isumalluutit piginnaasalluunniit amigaatigineqarneri pissutaallutik innuttaasutta pisinnaatitaaffii avaqunneqassanngitsut Naalakkersuisut isumaqataaffigaat. Inissiinermi suliat suliarineqartarneri naammaginangitsusut inatsisinilu piumasaqaataasut malinneqannginneri Ombudsmandip paasiguniuk, tamanna Naalakkersuisut ajuusaarutigalugulu akuerisinnaanngilaat. Kommunini sulianik suliarinnittarnerup pitsannortinnissaa Naalakkersuisunit pingaartinneqartorujussuuvuq, inissiisarnerimmi angajoqqaanut meeqqanullu tamakkiisumik paasissutissiisumik tunngavilerneqarlutik erseqqissumillu tunngavilersuuteqarlutik taamaallaat pisassammata.

Meeqqat tapersorsorneqarnissaannut Inatsisartut inatsisaanni allannguutissatut siunnersuummi UKA2023/29-mi saqqummiunneqartussami meeqqat tamarmik angerlarsimaffiup avataanut inissinneqartut meeqqat illersuisuannik neqeroorfigineqartalernissaat qulakkeerneqassaaq. Suliap suliarineqarnerani meeqqat pisinnaatitaaffiisa qulakkeerneqarnissaannut meeqqallu tusaaneqarnissaanut meeqqat illersuisuat ikiuutissaaq.

Ikiorneqarnissamut ikiorsiiffigineqarnissamullu periarfissat arlaqareerput.

Angerlarsimaffiup avataanut inissiinissaq aalajangerneqaraangat, aalajangerneq naammagittaalliornissamut ilitsersuummik imaqassaaq. Aalajangerneq pillugu innuttaasup naammagittaalliornissaanut pineqartup sumut saaffiginnissinnaaneranut aqqutissiutissallugu oqartussat pisussaaffeqarput. Suliarlu eqqartuussivinni suliarineqassappat innuttaasooq eqqartuussissuserisumik tunineqarsinnaavoq.

Tamatuma saniatigut akeqanngitsumik inatsisitigut siunnersortittoqarsinnaavoq, taanna nuna tamakkerlugu inatsisitigut ikiuisartut, Ikiu, aqqutigalugu pissarsiarineqarsinnaavoq.

Inissiinernut tamanut sulianut atatillugu eqqartuussissuserisumit ikiorneqarnissamik piumasaqaat eqquutsissallugu piviusumi ajornakusuussaaq tamannalu isumalluutinik atuinartorujussuussaaq.

Kommunip ingerlatsiviani suliamik suliarinnittariaatsip pitsannortinneratigut isumalluutit atorluarneqarsinnaanerusasut Naalakkersuisut isumaqarput. Meeqqat illersuisuannik neqerooruteqarneq annertuumik pingaarutilimmillu pitsannoriarneruvoq. Tamatuma saniatigut allaffissornikkut naammagittaalliorsinnaanermik aqqissuussaqareerpoq.

Innuttaasut pisinnaatitaaffii qulakkiissavagut. Inuillu Pisinnaatitaaffii pillugit Eqqartuussivimmut saaffiginninnissap pisariaqartilinninnerani pisinnaatitaaffiit qulakkeerneqassapput. Suliallu ingerlanerata ukuit arlissavai. Kommuniip sulianik suliarinninneratigut innuttaasut pisinnaatitaaffii qulakkeereernissaannut nukissavut atorutsigit pitsaanerpaaq anguneqarsinnaalissaaq.

Naalakkersuisut taamatut oqaaseqarlutik immikkoortoq Inatsisartunut pitsaasumik oqaluuserisassanngortippaat.